

少師朱襄毅公督蜀疏草

少師朱襄毅公督蜀疏草卷之

塘報各路功次疏

欽差總督四川兼制湖廣荆岳鄖襄四府陝西漢中一
府軍務策應緩急督理糧餉兼巡撫四川等處地方兵
部左侍郎兼都察院右僉都御史臣朱燮元謹題爲塘
報功次舊情事天啓三年三月初八日據長寧納谿二
路四川總兵官李維新監軍紀功叅政閔夢得副使李
仙品僉事劉可訓知府鄭朝棟同知段師文推官胡平

表等塘報本月初三日據加銜遊擊舒遐報稱差塘兵
范興旺一路往楠木埕水架坡哨探截殺初四日至窩
尾遇賊往興文界搽劫被興旺同李勝栢等截殺生擒
一名王宗貴係真苗賊婦女四口槍標長刀十一把舒
遐親統兵陳旺等一路往拖船埕於初三日晚至尖岡
山見白鹿廟有號火密於初四日四鼓統兵圍殺遐親
斬一顆千總羅貴等殺傷賊黨一十七名各奔命逃走
獲刀槍十四件絮被五床氈衫四領氈帽六頂著傷兵
一名又招卜昏等處降民向桂枝男婦七十餘名口等

情同日又據鎮道塘報本月初六日午時據舒遐報稱
降民葉興等欲搬出投降因賊首吳加富坐路攔阻乞
發兵接援職於初五日夜統兵至尖山子卜紅槽撞遇
賊兵劫殺降民卑職截殺一陣親斬一顆趙貴吳成共
斬苗級一顆范興旺李勝栢各斬一顆閻登瀛胡國華
等共斬一顆舒童斬苗級一顆大弩箭筒標槍短刀二
十八件絮被五床等情本月十九日據鎮道報稱據叅
將范繼道塘報探得賊兵三百餘在萬里箐一帶整米
本月十三日隨令叅將羅尚文發千總賈元倫魯法高

等率兵二百至彼出奇截殺賊敗走生擒六名同日又據范繼道塘報偵得酋父子俱退回永寧止留千餘屯劄麻糖坎本月十四日發千總雷順王加勝胡倬鳴等百總武應鎬等率兵百人乘夜焚襲賊寨殺賊無數斬功四顆次日我兵又於三塘伏草賊發馬步百餘前來躡探王加勝等躍馬追趕殺死阿弟姪僞都司陳第羣賊搶去活功五名合行塘報三月二十七日據鎮道解報據叅將范繼道報稱本月二十二日據偵探官胡舜孳獲姦細李翺受崇明僞叅將假報賊首胡宗祿投降

賞銀十兩去後回賊營與宗祿對坐飲酒崇明賞以金
手獨鞍馬田種三石加以偽總兵職銜復出詐誘官兵
適有先被綁今走出李門子在內見飲酒賞金加銜等
事對證明白解道審吐是實轉解到臣覆審是的卽梟
示訖三月二十七日據鎮道塘報本月二十五日寅時
先發副總秦翼明先鋒張令中軍盧世卿帶領標兵前
至拖船埕其餘將領徐徐進發賊復在麻糖坎劄大小
十二營本日秦翼明等殺入賊寨大戰生擒二名獲槍
七杆馬二十匹數千賊苗望風奔逃又據盧世卿部下

標兵擒獲活功五名口等因四月初二日據鎮道塘報
據加銜副總秦翼明呈報麻糖坎功級計開一哨楊進
忠招降婦女二口男子三名小口二名龔應照招男婦
四名口小口一名冉世選擒賊一名張自先王弘化部
兵等十名各俘獲大小男婦十五名口賀得興斬功一
顆加銜叅將秦拱明部下官兵得獲男婦七名口馬二
十匹花標旗一面皮盔一頂雲肩一領槍五十枝劊刀
二十五把綿甲三十七件擒獲苗賊四名加銜副總張
令本日先衝酋兵將營盡燒當時偵得瀘州衛百戶戴

鳴鳳有兵三千餘在洞被賊圍住七日卑職卽於二十
六日三鼓領兵平明到洞酋兵一見盡逃救出鳴鳳等
三千名口同督兵追至青山崖與酋交戰至午令斬苗
首土指揮一顆納千總斬苗級一顆丁應科等擒獲偽
副叅將楊氏等三口中軍盧世卿部下千總雷鳴春
督五標營兵當陣生擒惡賊活功六名婦女四口斬級
二顆二十六日發兵前往瀘州衛遇賊突出斬獲首級
四顆擒獲男婦一十一名口理合塘報同日又據道鎮
塘報三月二十六日申時據將官龔崇貴報稱二十五

日奉令同守備龔崇勝任世翰余一鵬等馬步兵二百同秦國俸等衝鋒至麻糖坎生擒僞千總一名柳信明斬獲功級二顆招降羅文魁等男婦四十名口二十六日各官兵又追至青山崖招降民余成德等男婦四十五名口同日又准參將林兆鼎手本據加銜守備韓自明等三員招出瀘州衛白雲洞招撫降民蔡應龍等十一名先鋒周啓王正友斬獲首級二顆刀弩二件同日據加銜副總何正光報稱據羅先春差塘兵李二等於九姓拏獲賊兵鄭應才王昌祚刀槍四件又准林兆鼎

塘報據加銜遊擊冉世烘報稱二十六日早職親督先鋒五百名至九姓與賊對敵斬首級一顆生擒四名得獲苗婦五口將官閻登瀛兵任學於落卜收生擒一名韓自明兵何貴等生擒三名口將官龔崇貴報稱二十六日同守備龔崇勝帶官兵卒應學等兵千餘追至青山崖生擒二名斬功二顆加銜僉書劉世忠報稱本部官兵黎洪等至地名落簿古得獲男婦四名口督陣官耿燾獲功二顆同日又據鎮道塘報二十八日據加銜遊擊曹守爵報部兵生擒一名男婦大小五名口四月

初四日據鎮道塘報三月二十八日該李總兵查得用壩地方乃賊藏匿之藪又江門觀音寺係老酋劄營之地俱爲喫緊若不乘時掃清恐賊包截我後卽日先遣張令盧世卿等內丁李棲鳳副將林兆鼎何正光兵五千打得用壩一帶又遣副將秦翼明統兵進剿觀音寺一帶遇賊大戰張令林兆鼎一路總計生擒三十名斬功十二顆俘獲男婦幼孩共四十二名口器械二十二件百子銃一門羸馬牛五隻僞勅四紙又據張令龔崇貴王受命招降得用等處苗民一千零四名口又據秦

翼明報往觀音寺大戰生擒十七名斬級九顆盔二頂
槍二枝烏銃一門樊虎七大營賊盡逃去營寨盡燒各
回營道鎮自備花紅銀牌犒賞以作士氣功級紀驗外
合先塘報同日又據道鎮塘報三月二十九日辰時據
加銜叅將秦拱明呈報招到永寧衛人周可孝周林等
六名口四月初一日辰時據加銜副總秦翼明塘報三
月二十九日奉道鎮令督兵再打觀音寺卑職分兵三
路一枝正攻賊營一枝由青山崖一枝由瀘州衛三面
約攻生擒活功十七名斬獲功級九顆又於龍山寨擒

獲許天相等男婦三十名口馬四匹解報到道審明安
插功級紀驗同日據鎮道塘報三月二十九日申時准
叅將林兆鼎手本報稱將官胡緯兵陳啓等於地名赤
崖生擒一名李受將官程之蕃林魁兵苟時芳等於青
山崖斬苗一顆生擒二名將官閻登瀛鄧彩兵朱虎於
灘壩斬賊級一顆同日又據舒遐報稱二十六日領兵
前往落卜列偵探與賊對陣曹庚當陣斬獲偽守備杜
明舟首級一顆偽勅一道黃傘一把范興旺趙貴陳旺
追上崖洞殺死賊兵五名墜崖未割首級得刀弩長槍

十五件老幼婦女三口水牛三隻又據鄒林報稱二十七日發兵往瀘州衛哨探擒獲活功二名任友榮朱法合行塘報四月初五日據道鎮塘報本月初一日據加銜副將張令督內丁李棲鳳并盧世卿挑選標營官兵王思堯等及百戶戴鳴鳳前去探剿初三日回報生獲功二名斬級二顆俘獲一口馬二匹督陣官居敬與李棲鳳等招出九姓龍山八寨頭人偽參將王文等斬其總管二名牽所部一千餘人投降王文黃應龍等十四人斬賊來降賞花紅安插又報林兆鼎招降一百六名

口斬功二級俘男婦十名口槍刀六件楊應岳部下生擒六名斬一級俘獲一口胡明臣挈獲細作二名楊光增生擒二名張洪烈部下生擒二名龔崇貴報初二日同龔崇勝奇勝招降宣撫司民雷富等一百五十四名口鄭知府部將文運開王懋官等斬八顆俘獲男婦二十七名口槍弩二十件牛馬二十九匹隻俘獲五十六名口初三日領副將秦翼明等挑選所部攻青山崖功次查明另報本月初六日據鎮道塘報本月初二日據遵義營統兵加銜叅將楊應岳報稱初一日發兵攻打

崖洞對陣生擒苗賊五名隊長李國明斬功一顆把總
任尚熒哨官劉興生擒一名兵王可貴胡勝生擒一名
同日又據都司胡明臣呈報守備彭文舉生擒一名千
總楊其俸生擒一名僧一名千總羅聖甫擒獲四名又
據叅將楊光增呈報守備黃明把總辛尚德等領兵踰
瀘州衛前二十里偵探擒活功二名鄢文旺王受又據
遊擊張洪烈呈報前於三月二十九日發守備扇天機
把總張昌運率兵拏獲活功二名又據加銜都司馬斗
煥同南岸劉諧合打排桐洞斬功二顆除驗給功票合

行塘報四月初七日據道鎮塘報本月初三日酉時據
加銜副總秦翼明報稱奉令攻取青山崖卽於初三日
五鼓發本部千總譚之臣等統兵一千弟拱明千總陳
紹統兵八百石砬營姑女將部下坐營秦永成等兵二
千餘同抵賊巢賊勢兇勇卑職卽犒賞鼓舞四面夾攻
縱火焚燒自辰至午極力攻打賊猶死拒衆兵奮勇直
上賊奔逃走斬擒甚多獲盔甲槍刀馬匹不計其數又
據秦拱明秦永成秦可各報相同四月初九日據鎮道
塘報本月初二日酉時據監紀鄭知府報稱發土官文

運開領苗兵阿撒等往掃洞苗阿撒爲首烏角爲次奮
勇斬賊級二顆擒獲婦女六名口馬二匹牛四隻槍弩
二十件又據加銜叅將王懋官等於初二日攻打落薄
林等處守備安文元把總阿柱共斬僞百總首級一顆
苗兵什粗溫繼富王士賢吳興勝共斬賊級三顆阿繼
張通生擒一名男婦四口牛四隻王昌胤親斬一顆湯
應詔等獲苗婦二口王舉賢韓加奇等得馬四匹牛八
隻王岷勝等生擒男婦九名同日據鎮道塘報本月初
五日辰時據加銜副總秦翼明叅將秦拱明等呈解青

山崖得獲功次到道據該道鎮逐一研審但係酋胡宗祿阿弟等各部下逆黨法難輕宥者因人多不便轉解會審明白遵於令牌下徑行梟斬牛馬器械老幼發獲功各營收領投降者安插其經歷章守謂及子章志遴及胡宗祿阿么妾係干謀反重犯另文解審仍動支賞需銀二百兩分犒各獲功官兵以示鼓舞計開副將秦翼明下中軍加銜都司郭起柱營兵生擒偽將胡宗祿妾艾氏活功八十名斬級九顆男婦五十名口馬二十匹牛三十隻器械無筭一加銜叅將秦永成秦可馬斗

樊本營官兵生擒僞左丞相章經歷父子二人妻女二
口僞元帥胡宗祿妾嚴氏阿么妾王氏賊兵一百七十
四名斬級十六顆俘獲婦女一百三十名口馬四十八
匹牛一百八十隻青黃傘二把器械無計又秦永成招
降男婦八十名口一加銜叅將秦拱明部下斬功二十
九顆生擒八十四名獲男婦五十三名口馬九匹牛十
隻器械無筭納谿路三月十一日據鎮道塘報本月初
九日辰時據江安縣報稱令加銜遊擊盧大武率兵一
千至爐煙堵殺忽遇賊兵哨馬三十步兵一百連殺二

陣生擒一名斬苗級一顆得馬一匹同日又據瀘州知州王新民報稱發兵至白崖壩探得賊兵二百餘下山遇敵千總鄧以孝白啓等率百總高順等奮勇殺死賊兵十二名止割級二顆生擒四名審明梟斬訖同日據鎮道塘報據加銜都司仇可陟部下百總張天威劉敬於象嶺斬功二顆又據加銜遊擊李上進部下百總孫正芳於江門伏塘生擒姦細一名又鄧懋官哨官繩守富等於蠻洞子生擒一名二十四日據李上進下兵張虎於倒馬坎生擒一名三月初四日據加銜副將劉養

鯤守備張學周下兵於蠻洞子生擒賊兵范起祿瀘州
申解守備李亮千總夏繼先等於葛石埡斬級一顆賊
子旺兒又夏繼先於大崖口斬功一顆本月初七日據
加銜僉書范祖文報稱先發丁世先親兄丁世忠從間
道回永寧招降於三月初七日有世先舊人陳用陳榮
趙民用秘約樊虎營中僞守備王先陸三萬騎馬二匹
兵二十四名奔出投降收管報効審係苗賊俱已梟示
旺兒發瀘州收養三月十四日據道鎮塘報據加銜副
將劉養鯤報稱部兵徐啓至爐煙槽拏獲苗兵三名手

執總兵令旗一杆長刀一把初九日酉時據守備王化
羅忠臣加銜都司胡汝高指揮閔法各部下兵共擒賊
兵三名兵肖元斬賊級一顆本月十八日又據道鎮塘
報二道與叅謀知縣趙民戴加銜副將劉養鯤守備張
學周計議賊勢窮蹙衆心已離宜及時招降以孤其黨
養鯤卽遣人行間十五日午時有僞總兵阿交樊虎兵
藍二李有先刁惟興王之民等七十六名自賊營出川
龍山來職營投降朱朝聘提兵援接前來各賞銀二兩
又花槍十七枝白杆槍二十三枝大弩二把降兵安置

南岸酌給糧餉以風後至二十三日據鎮道塘報據副將劉養鯤報稱本月十五日奉令衝打鷄罩山象鼻子併中箐內關擒斬功次守備孫胤燕瑞鳳馬如鹿何守義各斬功一顆銃手張義銃打二功楊國太毛明各打一功守備張學周生擒偽守備胡見一大功何湛然兵何太何才共斬二級兵曾祿斬一級黑茂家兵黑斗斬二功朱朝聘部兵朱伏斬二功何繼光家丁何文煥李邦國等斬功三顆鄢玠率子姪鄢一傅等親斬四功鄢一伏斬二功千戶鄢一舉斬二功百總周承宣斬二功

張伸一功石殿邦斬二級哨官劉之宸一功獲婦女一
口割燒賊營燒死三十餘人原係乘夜劫賊俱未割級
鄢玠部兵所獲花槍白杆槍十七枝綿甲二件牛二隻
長刀一把銀一錠重八兩賞兵訖鄢玠父子又於雞罩
山橫山八甲招出男婦三百餘口羸馬三匹三月二十
四日據鎮道塘報據加銜副將劉養鯤等報稱將官朱
朝聘守備劉之寧於本月十六日暗入賊巢值賊首楊
選大老虎陳文督兵往進寶寺打米追斬三十餘人賊
使馬兵來救止割二級生擒偽守備一名柳元儒僉書

胡肇虞兵斬殺三十七功生擒僞都司何守宗弟名五
么同日又據加銜副將劉養鯤塘報本月十七日據叅
將鄆玠拏獲賊功周成先等三名三月二十五日據道
鎮塘報據瀘州申解據千總鄧以孳等於白崖灣拏獲
活功四名十三日又據劉養鯤報遊擊朱朝聘兵於大
花石生擒二名十四日本官兵張學通等於太山廟生
擒二名斬功三顆十五日朱朝聘同贊畫黑茂部兵黑
勝等葛石堽寶月寺擒獲男婦二名口斬功二十六顆
十六日又據瀘州解據領兵生員李儒儼楊杰守備羅

現聰等於葛石堽擒獲活功羅友等九名十七日又據
劉養鯤守備張學周部下百總張學通於韓家洞斬級
二顆十八日據守備燕瑞鳳督兵燕東等於葛石堽斬
功六顆任應高陳先二十二名各斬功一顆共二十二
顆燕可大等又於漏潺子斬功六顆燕天得一顆二十
日據守備鄭世臣龔惠等三十人於白崖坨捉獲活功
三名二十二日據遊擊黑茂於觀音堂斬功一顆各陸
續報道合行轉報四月初六日據鎮道塘報本年三月
二十四日據加銜副將劉養鯤報據部下百總安朝於

撈草溪擒獲賊兵一名遊擊胡國仁部兵李貴於大洲
驛得苗賊二名箭一籬大小刀長槍共十四件遊擊黑
茂部下王有貴等於白崖坳擒苗賊二名二十七日劉
副將部下指揮宋璉等暗入永寧偵探散招降小票回
至金鋼背殺賊一名兵楊啓於花崖拏獲賊兵一名挨
牌一面四月初一日朱朝聘部下指揮趙加陞守備何
金化等招出僞都司蔣貴等六十四名初二日據遊擊
鄔玠差千總夏繼堯等於木易崖斬僞都司僞守備二
顆苗賊三十一顆得獲男婦六名口花槍白杆槍大弩

三十五件馬四匹又何繼光朱朝聘部下招出永寧降
民六名本月初四日劉副將牌差兵任啓招降僞總兵
阿弟樊虎部下韓允慶并男婦一百五十名口陸續解
道俱各驗明安插隨給功票候叙本月初八日據鎮道
塘報初六日據劉養鯤將官黑茂等發兵探得小酋在
乾溪舖借水西兵劄十七營又據部將喻登芳等奉令
同田有龍等督本部諸將兵於初五日夜丑時潛入大
崖口直搗八甲賊衆措手不及各兵奮勇衝殺二百餘
功生擒僞都司張才苗兵十一名苗婦四口幼孩不計

馬牛五匹隻又獲苗將樊繼昂妻并弟樊繼盛同妻鄭氏又燒寨二十餘處所獲器械甚多四月初十日據鎮道塘報本月初八日申時據加銜副將劉養鯤將官鄧懋官黑茂守備張學周等塘報本日卯時據遊擊周應宿自賊巢出報喻登芳招出苗兵一千周應宿招出一千丁世先羅奇縉共招出一千范寵招出四百餘人共三千四百已出江門又得船四隻牛馬九匹隻又報水西頭目三百先據永寧城勒酋金銀酋劄涼傘舖共賊四十大營又將金壺銀器重賞頭人各三百兩意圖死

戰初七日我兵攻破中弔三溪橫山八甲營寨盡燒火光
光明一晝夜將宋江黑石包屈丑等寨俱燒訖所殺功
級不知其數此一陣也軍威丕振賊皆歛退斬殺功級
查明另報同日午時又據胡汝新於大風埡拏獲苗兵
一名唐明陽初八日午時據守備楊承宣報稱於大崖
口青岡坪擒獲苗兵二名永祥長久係偽總兵盧么家
兵合行塘報本月十一日據道鎮塘報本月初九日申
時據加銜副將劉養鯤將官黑茂朱朝聘等報稱據將
喻自忠等奉令於初七日丑時又攻破螃蟹溪等處將

偽都司先萬壽余雙和等一帶叛賊管寨盡行燒殺死屍遍地約六七百餘功止割一級解驗爲據投降千人又據將官何繼光張學周等奉令於本日五鼓同田有龍等直衝橫山焚燒追三十餘里賊首陳寶高叫不要燒待我來降所殺功級二百餘其馬口崖一帶周圍三百餘里賊巢皆酋供贍之地俱爲我所破卽欲徑衝永寧因各兵糧米俱盡難以深入理合塘報遵義路本年三月初五日據監紀僉事趙邦清塘報二月二十四日酉時准加銜副將秦衍祚手本報稱本月十四日本府

督兵由二郎壩至灰堆山與副將沈崇極合哨搗蘭哨有賊兵本府分守備趙一傑王文學等領兵去大洪寺左右埋伏三路與蘭苗大戰斬獲多功另報三月十九日據遵義趙僉事塘報據領兵加銜遊擊陳鳳報稱於本月二十五日與各部千總歃血訖兵馬向木鹽寨進發至小關口正遇奢富領兵前來接陣鳳令衝鋒穆自乾并羅安良部下千總羅友孝等兵分三路圍擊鏖戰數時鳳令四山舉砲親率各部頭人一齊躍馬鳳槍殺死偽長官阿楊斬首一級羅友現穆自乾羅彬王安等

共斬五級百總趙時富生擒偽總管楊榮又趙時美等
共擒抹賽冷二賊兵敗走鳳驅兵至洗馬塘袁力與斬
首級一顆李上蒙斬功一顆更得天時爲助河水忽泛
賊兵渡河不及溺死者無算得獲苗刀一把皮甲一籠
將軍銃二門喇叭一管噴筒一箇各處賊營盡行燒燬
楊守江見鳳勢大恐備雞狗與羅友現等歎血盟誓待
其子到家卽渡江投見當將投順民唐正國家小三十
餘家送至桃紅灘安劄今將功級刀甲令叅謀生員李
承實解驗三月二十三日據遵義監軍道趙僉事監軍

僉事盧安世塘報二月二十日復取落紅後至三月初
五日夜至二更雷雨大作賊乘機厚賞精悍苗羿三十
名渡河劫營被加銜副總秦衍祚標下中軍劉登第塘
兵齊起斬獲壯功三顆長刀二把槍弩二件皮甲二籠
生擒羿子一名供認前斬首級俱係抹賽其餘溺水身
死初九日原任副總沈崇極遣張奏凱任鑑至岔角灘
對敵箭傷披青氈騎黑馬頭目一名舒弘烈至落紅口
對敵銃傷苗賊一名誘獲利箭三百餘枝初十日又據
秦衍祚標下把守土城加銜都司袁應宸報稱應宸初

八日領兵至鬼妖寨奮勇大戰斬獲偽守備崖婁并賊子崖新等一十一顆馬二匹又部兵蔡老虎等往銅鼓壩偵探撞遇賊兵接殺斬獲賊級二顆以上功級該卑職親驗給票該三月二十四日據監紀僉事盧安世塘報本月十二日准副總沈崇極手本據標下遊擊張奏凱羅仕傑報稱於十一日一更同降民羅華發兵渡河攻打羅向宸全家寨至十二日辰時大戰連攻二營張奏凱部兵斬級三顆張抹賽首級一顆千總蔡茂首級一顆奪馬三匹羅仕傑部兵生擒馬兵一名寅狗斬級

二顆馬三匹羅華斬功六顆其餘墜崖死者三百餘賊
南寨營房盡燒十四日又據副總秦衍祚標下千總蔡
國學報稱於石家渡斬功一顆追殺溺水死者五人同
日又據趙僉事加銜叅將趙國璽報稱於本月十五日
差千總高琴至蘭州官莊坪撞遇奢兵截殺甲兵陳俸
志楊芳各斬賊一顆刀槍二件十九日差千總祝朝富
帶兵往賊穴至大村與賊兵相撞敵殺甲兵吳二徐天
錫斬苗級二顆同日又據遵義趙僉事塘報本月十七
日據督陣官羅萬勝稟稱偽都司雷小善於十四日暗

攜家口八十餘房男婦一千餘渡河投降侯棗將點過犒賞牛酒銀十兩等因報道本道多方傳諭今雷小善攜家千餘來降蘭人歸附自此始賊之羽翼漸剪理合塘報四月初二日據遵義道趙僉事塘報三月二十三日准加銜副總秦衍祚手本本月十五日據守備趙一傑報稱分布指揮袁加勤等督兵四百往蘭地青岡寨剿賊追至崖三溝大戰斬苗級十一顆落崖死者不計生擒賊婦三口槍刀弩十一件本府親監中軍劉登第又於落紅口斬級七顆得銅鼓四面槍刀五件弩箭二

副皮甲一籠船二十隻生擒二名放火燒燬賊房千餘間等因報道合行轉報同日又據遵義道趙僉事塘報三月二十四日准副總沈崇極手本移稱本月十六日本職會同監軍盧僉事督率漢土官兵下河行遊擊舒弘烈等找搭浮橋四座半日卽完卽日大喊山搖岳震登崖接殺弘烈部下銳手汪大業打死馬兵一名舒弘謙部下千總鄭雄王來陞斬首一顆燒燬余家寨談廠寨九溪寨并明九二家房屋數百家追進三十餘里十七日又據舒弘謙報稱部兵吳宗林斬首一顆又據守

備張倫山督兵將衙寨百餘間燒燬擒獲苗賊一名本
官百總蘇一龍帶領王高等奮攻落紅山頂火光冲天
銃打苗賊不能割級又李萬富生擒苗名苟德又據防
守土城加銜叅將趙文進奉道令發加銜守備趙舜王
同督陣官劉興榮至黑坪固與賊對敵趙廷華等共斬
賊級九顆生擒男婦四名又據降將羅華指揮賈承宗
等捉獲被擄民全文化審係荊州府客人發舒先鋒營
收訖十八日舒弘烈解俘獲男婦十三名口趙文進報
稱奉令至唐朝壩斬賊級二顆槍一枝絮一牀盧監軍

驗訖等因四月初二日據遵義趙僉事塘報三月二十
二日午時據本道差旗牌鍾俸醫官董尚策稟稱蒙差
役同董尚策往大羅壩招撫鄭應顯游朝炳十七日行
至地名海龍壩遇駱麟土兵急報水西有馬兵步兵二
名來水口寺哨探見官兵擁劄卽退回落朝十八日行
至落朝見水西馬兵八十步兵難以數計卽潛身高阜
窺其出沒何路但遵義大道止有桐梓塘兵哨探竝無
別兵抵敵又聞阿烏迷劄三大營於赤璧莊欲由小路
衝羅村侯良柱營由桐梓截餉二十日至桐梓報商同

知卽發守城指揮楊才領兵三百星夜往婁山關樅關但水西因龔自明招邊民過河將路口把守至緊役等不知苗話難於前進回首撞遇降民胡崇富崇信卽與他盟誓私偷路與鄭游二人通話探水西賊勢看二人歸向何如候崇富回日另行再報等情到道據此本月二十三日午時准加銜副總侯良柱報稱卑職自統兵劄斂箕壩以來發兵躡塘設伏拒險晝夜隄防毫無懈怠於三月十九日戌時據都司張金玉鍾仕祿塘兵王宗成等報到奢寅於水西借兵西賊允發莫德官江之

龍游朝炳鄭應顯楊維新等統西兵二十七營劄緝麻山關王廟濫泥寺俱係白布帳後面陸續添來賊兵不急等情二十日午時又據領兵加銜叅將趙國璽報到奢寅暗在苟村點賊劄十大營只在等西賊到齊約期夾攻我兵幸得南川叅將陳一龍統兵萬餘已到貢生傅元和官兵亦已調到同劄卑職劄爲連珠營首尾相應有羅安良劄桃紅灘趙國璽劄羅村卑職一面調撤同劄各官散劄零星臨難應援恐墮賊計幸趙國璽細心整兵俱聽卑職調遣羅安良近日亦聽約束可再發

兵二三千赴援此時之賊非比泛常激切具報同時又據同知商良弼報稱卑職奉令桐梓招撫開墾並團集義兵士農工商方幸樂業猶恐賊兵出沒每日分投各路安塘把隘直抵遵義探聽消息近據各營官兵屢報水藺合兵欲衝綏桐以阻糧道今見劄營於緝麻里又據駱麟飛報許多哨馬已至牛碗園時隱時見不知欲往何路以致城內居民驚疑復行逃散卑職出牌嚴禁不許擅動搖惑人心隨據各民回稱守城之兵旣發往各路把隘義兵臨時各攜家口誰人相顧豈可居城待

斃止願權移元田壩近山挖蕨救命卑職查得元田壩
民多復業耕田亦欲搬移卑職當喚主簿楊熠等守備
李爲棟李有富等公議將欲執一苦守恐臨難無策將
欲觀變相機民甚驚惶只得暫從民便各官亦同往彼
地劄營一則約束鄉民且耕且守一則團聚市民便於
復業且近大路防守有人庶糧道可通城內房屋不致
折毀等因又據加銜遊擊陳鳳塘報本月初六日加銜
侯副總牌令分布羅安良陳鳳發兵渡河合哨鳳就於
是日統率羅安良部下千總百總併鳳下義兵渡江徑

抵地名木圍寨只聞銃砲連響鳳卽發兵前去偵探係是守備張金玉陳永興冉世卿等率兵攻打楊守江寨財物牛馬盡行劫去守江等家眷人口盡行搬入地名大寨候守江子回日方來投見鳳比收兵回營轉至地名闡王寨復遇賊兵接陣鳳當點羅安良部下千總羅加勝郭廷舟等把總王啓孝等奮勇生擒偽總管一名阿靴釋令入寨招降本月十一日楊守江爲子不來將親信總管楊國興楊國法等家口三十餘房來降又據商同知報稱據哨探把總田臣稟前至海龍壩見賊馬

五六十在河邊牧放一帶俱有煙火駱麟又哨至西界
鎮南關金刀坑得一舊民賈似恩審稱賊屯兵五營在
苦茶園四營在玉木洞掌營者是阿烏迷阿倫親弟者
烈已發人約奔酋又云去借各苗府兵齊同截綏桐宮
兵聞報駱麟卽至崖門關屯劄等因到職報道又據本
道親丁趙陞竝加銜遊擊李棟舍人羅萬勝稟報二十
日侯副總差金玉前去哨探見緝麻山起至孫蓋壩二
十里賊兵相續不絕勢甚猖狂又三元寨蘭賊劄四大
營原有不見者又據叅將陳一龍塘報相同又蘭州奢

寅扶國禎在高籬芭劄二十營趙國璽差人去探聽招
高象乾象乾云奢寅去水西借兵來衝官兵先衝沈秦
二營若開卽來攻抵水崖官營又據趙國璽雷震乾本
月十五日差千總高琴領兵去蘭州官莊坪哨探撞逢
奢寅差來探我官兵賊兩相截殺我兵楊芳陳鳳志各
斬功一顆花槍一枝刀一把絮一牀今番水西兵多乞
賞文令各營俱聽侯良柱分布據此本月二十四日午
時又據侯良柱塘報本月十九日戌時節據都司守備
張金玉鍾仕朝報稱探得西賊劄兵八大營離營三十

里乞整兵拒敵且幸陳一龍領兵先後亦到軍聲頗振
今賊深入野無所掠卑職自有破敵之計至於雞晒固
功次另文解報同日又據侯良柱塘報卑職於本月十
八九連日發夜不收偵探回報西賊劄二十七營至濫
泥寺關王廟二處後來之賊不絕二十一日二更時分
發守備何金鰲帶馬兵十騎星夜暗探天將明至三合
山與賊攔頭一撞賊兵四十騎與何金鰲交戰幸我後
發陶謨二探接應方得奔回大營卑職親統馬步銃手
家丁并陳叅將其帶兵萬餘追至三合山趙國璽羅安

良卽時調到大戰數合卑職查得小路數條恐賊包圍
卽與陳叅將趙國璽等計議必先得地利方纔取勝卽
傳令俱至青蛇嶺劄營一面建營一面對敵不息逆賊
口叫水蘭二家人馬二十萬將十萬取綏桐十萬來交
戰等語乞發兵把婁山大小二關小水田等處這番賊
勢非比往常急切燃眉等因到道據此該本道看得奢
寅勢窮無可爲計又借水西兵合力夾攻除行俟陳二
將及趙國璽等萬分隄防懸賞鼓舞調兵堵殺外理合
塘報四月初三日又據趙僉事塘報爲再報西賊勢尤

猖大力難拒敵事本月二十五日未時據本道旗牌鍾倖舍人任啓稟報西賊於二十三日大勢人馬齊至毋豬窩我兵連日大戰賊兵勢重殺傷官兵數百拒敵不住副總侯良柱收兵退劄崇岡嶺把截桐梓士民盡數驚散全是水西兵馬蜂擁而來勢不可當等情二十六日未時又據加銜遊擊李棟田應斗報稱二十一日辰時分藺賊奢寅扶國禎奢宏奢宸計合水西莫德官阿烏迷楊維新游朝炳鄭應顯等二土苗會合馬兵二萬有餘步兵五萬餘還有山箐中埋伏者難以目見奢寅

扶國禎等自三元寨渡河到孫蓋壩與西賊合哨水西
莫德官阿烏迷等自鎮南關渡河由金刀坑緝麻山關
王廟孫蓋壩亦與藺賊合哨直到陳侯二將營下侯陳
二將卽喚棟與田應斗趙國璽羅安良并各將領官登
山岡哨望出兵堵截趙國璽安變等領兵由趙統壩侯
副將陳叅將分兵由鴨屎箐追殺賊兵又於平壩圍堵
截彼二土酋兵見官兵四路安排旋卽退回諸將官以
衆寡難敵權將各營移劄青蛇巷拒守姑俟西賊食盡
銳挫方可攻擊二十二日蚤移營方定二十三日辰時

賊兵將官兵周圍數匝如蟻聚食我兵奮勇斬獲賊級
百十餘顆犒賞復戰至未時分官兵死傷衆多賊兵更
奮輪戰申時分拒守不住只得退出夜卽小箐口拒守
幸於南川調到陳一龍兵至不然則全兵沒矣幸保大
半其酋兵叫罵要將趙道趕出重慶分取綦江涪州省
城乞多添將兵救援各等情到道據此爲照藺賊奢寅
扶國禎等西賊楊維新阿烏迷等合兵數萬皆有勇悍
之徒其鋒不可當今二將之兵只可守豈敢言戰卽綦
江亦在累卵之間百姓多半出城入箐迓生桐梓街民

房屋復行燒燬賊勢甚熾人心俱散急須另行招兵非六七萬不可目前至緊至急合行飛報二十七日亥時又據副總侯良柱塘報二十三日賊兵添至五十餘營馬步約八萬衆將卑職與陳叅將重圍垓心自辰至申奮勇殺出斬功九十餘賊馬四十餘匹器械不計各賊忿恨急攻我兵久戰難支功級委棄收集各營住劄小營之前守險安營再圖進剿請乞轉報增兵增餉保守萬全又據加銜叅將李長榮報稱西賊於二十五日割營崇岡嶺近桐梓十五里比見馬兵數十衝入城下聲

言要出綦江取糧又截住米不使運往落紅等情本道
大膽已令秦衍祥兵回黃荆坪護餉以保重慶四月初
九日據真安綏陽路監紀巡守川東道右叅政吳國仕
塘報相同仁合一路三月十四日據監紀巡下南道右
叅政王世仁巡上東道副使徐如珂塘報二月一十八
日據加銜副總羅乾象稟稱據小關子遊擊王繼先都
司曾化魯報稱十三日發兵堵截箐壩斬獲一十四顆
生擒一名各等因陸續塘報到臣查得四路共斬功九
百二十顆生擒四百六十九名口俘獲招降共七千九

百一十二名口尚有陸續招出者數萬各項軍器七百四十一件牛馬四百八十一匹隻黃傘船隻偽劄銀兩器皿不計兵聲已震無奈西賊復爾結連兼有報烏鎮陰助諸苗聯絡勢復猖狂除行長納兩路攻打永寧紅崖以牽賊勢調發官兵堵截策應相機戰守獲功行道驗紀生擒分別梟羈以俟獻俘俘獲招降給票安插牛馬器械犒賞有功官兵失事文武行令戴罪陣亡兵士查明卹給外理合具題伏乞勅下兵部案候事平之日一體叙錄施行爲此具本謹題請旨天啓三年四月十

八日上奉聖旨兵部知道

飛報取永大捷疏

題爲飛報大捷事天啓三年四月十五日據長納二路
監軍道叅政閔夢得副使李仙品僉事劉可訓塘報准
四川鎮守總兵官李維新報稱奉令自三月二十四日
出師進剿攻破麻糖坎觀音寺青山崖天蓬洞等處分
布大小文武官兵攻打永寧卽於四月十三日隨據守
備陳善治劉兆斗等報稱將官秦翼明秦拱明秦永成
秦可等五鼓發兵與賊戰於土地坎殺賊大敗據稱本
日奢寅親統大衆五鼓迎敵我兵分爲八路接陣自己

至午殺敗苗寅斬功計約千級以外溺水死者無筭追
至老君營涼傘舖將賊大小四十營盡燒火光徹天所
損頭目偽將頗多寅賊身中二槍僅以身免仍奪坐馬
二匹銷金龍傘一把斬獲偽總兵鄭章秦拱明親斬偽
總兵吳繼盛首級鞍馬銀刀軍器生擒無筭去永寧止
十里偽總兵樊虎在陣被殺生死存亡未卜同日又據
道鎮塘報將官劉養鯤鄧懋官等發兵攻打橫山八甲
中弔三溪等處節次斬功九十餘顆招降苗民共一百
四名口生擒五名俘獲婦女四口招出偽總兵劉亨千

總苗目戴福壽陳友等六人又楊承宣范祖文胡國仁等於青岡坪拏獲苗賊姦細三名僞都司樊其才等五名殺賊四百人獲馬二匹槍刀二十四件又續招出男婦二萬名口馬一匹得獲大小刀五十把槍二十枝十六日又據總鎮塘報職等在瀘衛親見官兵畏怯難以驅策只得於十三日五鼓先發秦翼明等二萬攻打土地坎一帶逆賊敗退去後當夜密令張令秦國俸李維翰李棲鳳兵潛至永寧城下十四日李總兵同叅將張邦紘楊應岳叅謀陳旦贊畫官林禎內丁納尚勇總旗

趙瓚督陣居敬李在官陳善策胡榮并標營千總等官
百餘騎兵四五百人一面令中軍盧世卿督兵隨後接
應本職兵殺至城下逆賊四門堵截見勢不敵逆酋將
城中房屋四亂燒起亂殺軍民張令秦國偉李維翰李
棲鳳殺入小西門就於馬上生擒偽頭目周邦大楊丞
相衝開大西門出降二萬餘人跳城赴水者無計城中
煙焰薰天本職難以輕入止令張令等在西門外劄營
本職暫於紅崖對面高山劄住有職帖書如有能擒奢
酋父子出降者不但免其罪卽照頒定賞格陞授官職

决不食言用箭三十矢直射入賊路至於城中驚散婦女幼子本職逐一親審有夫者查還其夫有父母者查還其父母使其骨肉完聚將逃出人民另劄一山頭并不許在本營溷亂今永寧旣取則土地坎老君營永安驛江門一帶自清餉道自通三軍有恃其自衛以西洞寨盡爲我役矣卽今二酋見在一處而水潦等賊兵橫劄兩山十數營本職必乘機決戰生擒二賊以報國恩目今情形甚急除晝夜加謹執戈以俟決戰合先塘報又據推官胡平表加銜副總劉養鯤塘報相同等因到

臣看得逆酋奢崇明父子自知罪逆滔天不死不已購結鄰苗經年衝突自二月二十七日長寧大敗黨羽漸潰方借水西諸苗以衝遵義而大將遂合長納兩路之兵併力俱進從麻糖坎大戰轉入青山涼傘歡喜中弔橫山等處擒斬無算而二逆猶假鄰方應援之衆爲背城借一之舉四路埋伏以待我兵仰恃皇上威靈諸將戮力大戰一日勢如山壓賊計窮勢蹙乃始放火而遁文武各官俱於十五日住劄永寧城下惟是禍本未除狡謀叵測况紅崖天臺木脚木姜古牛酸草等七圍俱

稱天險除行督催五路上緊擒拏外一切功次行道查實紀叙理合具實飛報以慰聖懷伏乞勅下兵部案候俟事完之日一體行查叙錄陞賞施行爲此具本謹題請旨天啓三年四月十八日上奉聖旨賊巢攻克已有旨著督兵擒剿毋令元兇遁逸未變元調度有功併文武將吏人等事平一體敘錄該部知道

補卹死事諸臣疏

題爲續查死事諸臣乞賜分別褒卹以慰忠魂事先是奢賊發難恣肆屠戮與夫臨陣戰歿者自撫臣徐可求而下其四十三員俱經兵部覆奉明旨厚賜贈襲咨到之日一時人心感激倍爲踴躍今陸續申報尚有遺漏未經題明不敢不具請以慰幽魂行據按察司查得原任雲南洱海道副使報陞松潘道叅政李忠臣原籍陝西涇陽縣隨祖商賈住籍永寧中貴州乙酉鄉試天啓元年九月內便道抵家適值酋變不容赴任屢奉本部

院牌檄密約永赤王同知何指揮等歃血擒酋不意謀
泄賊擁兵入宅本官急叱四川迎接書吏徐汝勵引幼
子從旁門走出遂仗劍自刎該本司會同布政司看得
李忠臣散金結士約爲內應事未成而機泄棄藐孤以
若遣養士之效不孤致身之義已盡允宜贈卹以慰忠
魂徐汝勵受主遺命脫孤虎口應免京考等因又據分
守川東帶管遵義道右叅政吳國仕呈報覆查得遵義
府推官馮鳳雛不避艱險親入虎穴復城據守勞苦萬
狀天啓二年七月二十三日二酉夾攻本官挺身罵賊

不屈墜城及賊脅降自求一死被殺二槍卽時身斃骸骨無存威遠衛候缺經歷袁一脩本府司獄蘇璞俱義不從賊同墜城被傷身故看得三官皆勤勞王事以身殉難均應分別具題旌卹以慰幽貞等因又據按察司呈奉兩院批覆查瀘州鄉官高光死節緣由該本司會同布政司查得原任應天府通判高光於天啓元年九月因酋變本官削髮作偈曰君父誼尊削髮自盟臣子守定留鬚爲證與子生員高在崑募兵復城殺賊百人酋將本官追至大葉壩不屈同家丁十二人登時殺死

在崑走脫看得高亢值孤城被賊之時勵摩頂殉身之
義方竭力以衝鋒廼勢窮於穿縉身膏白草血濺青鋒
一時之大節已昭千載之忠魂不昧應從俎豆以勵頽
風等因又據監紀巡北道閔叅政叙瀘道李副使呈覆
查得永寧衛舉人胡纘賊未發難首抱杞憂條陳二次
及酋犯省纘乃集兵截斷爐煙小路被酋將纘囚獄苦
拷家口財產盡劫後賴伊弟胡緯行賄保出奔赴轅門
化誨宋武等擒何若海招降二萬餘人結酋腹心多人
急圍擒賊拮据四月不意本年十一月十七日營中延

燒火藥遂被焚死如縵赤心報國之臣應宜重加旌卹等因又據監軍二道呈奉本部院批覆查出陣亡各官由詳查得原任富順縣立功縣丞葛盛德同千總王成龍於天啓二年九月二十日西關與賊大戰竝家丁六人力戰重傷陣亡又查出成都後衛千戶鄭應欽實授百戶汪起蛟加銜守備劉自靖俱於天啓二年七月初十日江門殺賊陣亡加銜遊擊李縉於本年十一月十四日石子山對戰手刃數人因力乏被槍身死加銜守備孫世信毛民望加銜指揮李承宗於天啓三年二月

初六日仙人庵與賊大戰身死併應照例優卹等因又據兵巡上川東道呈奉本部院批覆查出遇難陣亡各官由詳該副使徐如珂回稱查出重慶衛知事王正經巴縣典史吳應元土沱驛驛丞蕭美於天啓元年九月因撥赴撫院聽事又本院旗牌成都中衛百戶范之偉同時遇難而死大足縣主簿張志舉典史朱應舉本年十一月初一日賊首梅寵率賊萬餘攻縣二官集兵陣於西壇鏖四晝夜至初五日叛賊葉省祭添兵數千夾攻張主簿竝家丁張成等被槍殺死宋典史見主簿被

害奮勇衝敵亦被殺死看得王正經吳應元蕭美范之
偉遇難暴棺家室流離張志譽宋應臯以縣佐小官捐
身殺賊其志誠壯其死可悲各官均屬歿於王事卹典
似宜分別從優等因緣由呈報到臣該臣看得叅政李
忠臣報國有心突圍無路投臣三揭除兇之意氣頗堅
遘禍一朝滿門之屠戮甚慘偶倖脫其幼子實齋憾於
重泉推官馮鳳雛獨障荒城蹇遭大疫衆寡之勢旣異
犄角之力全孤以身殉城不踵貪生之跡遺骸莫檢可
徵遇害之真鄉官通判高光以枕丘棲壑之身爲稱干

比戈之舉主僕十二人同嬰白刃忠魂千百載應祀覺
宮舉人胡縝先期具揭頗同曲突之忠謀臨難遭刑不
畏犬羊之虐焰卒以奇計脫奔旋復倡義招降溘死堪
嗟孤忠難掩若原任縣丞葛盛德主簿張志譽典史宋
應臯揮戈血戰壯志猶生經歷袁一脩司獄蘇璞知事
王正經典史吳應元驛丞蕭美遇難投城精魂未泯成
都中衛百戶范之偉重慶遇難成都後衛千戶鄭應欽
百戶汪起蛟加銜守備劉自靖江門戰死加銜遊擊李
縉石子山戰死加銜守備孫世信毛民望加銜指揮李

承宗仙人庵戰死千總王成龍西關大戰重傷身死具
皆捨身就義併應分別優旌再照馮鳳雛被圍不屈縋
城殞命遵義道僉事趙邦清已查的係西賊鄭應顯親
手執殺應顯實綏陽縣里長豈不識認原報偶爾差訛
幾致忠魂埋沒伏乞勅下兵部行巡按御史覆查照例
甄別贈卹施行爲此具本謹題請旨天啓三年五月初
一日上奉聖旨兵部知道

克圍擒撫功次疏

題爲恭報攻克險岡招撫苗巢功次事天啓三年四月十四日我兵奮勇攻復永寧已經差官張學周承差朱人階飛報外臣隨檄行總兵官李維新監軍道府等官閔夢得李仙品劉可訓段師文鄭朝棟胡平表等分布兵士一面進剿追拏二酋一面招撫以安苗黨去後續據道鎮報稱本月十五六二日打上紅崖大圍賊皆披靡又於十八日攻取天臺圍賊目卽具牛酒率黨數千人納降又於二十日差官張華等分頭招撫水潦四十

八寨一帶隨卽安插計連日共斬獲壯功一千二十八
顆生擒僞元帥僞都督總兵監軍副叅遊等項僞官張
尚義夏雲奇汪澤遠等二十五名斬獲大頭目一十一
顆俘獲男婦一百五十名口生擒活功三百三十三名
逆寅銷金龍傘一把瓜斧二隊皆龍鳳彩文槍刀衣甲
六十三件永寧宣撫司永寧赤水衛建武各千戶所百
戶印信一十九顆僞印六顆牛馬六十隻匹二箇奔入
古蘭龍場一帶意欲結連西賊等情十九日又據建武
遊擊滿思謙擒獲賊目大老虎羅文有等三名納路將

官鄧懋官守備劉養鯤等攻打紅崖高木馬克手爬一帶斬功三十三顆生擒賊目十三名招安地方三百里降賊目十二名民婦四萬三千二百五十名口刀槍八十件馬二匹本月二十八日又據巡北叙瀘監軍三道呈解僞總兵內閣給事中巡河操江員外主事等項僞官王偕沈林并水西僞宋總督部下僞總兵曾謨七僞叅將胡洞三等四十七名二十九日三道轉據推官胡平表等各部下將官潘映奎等生擒水西應接僞都督總兵駱文奇僞監軍李采并僞都司欽天監等項僞官

陳所蘊錢萬選田有金等共四十二名得興文縣并儒學及永寧千戶所印信五顆偽關防一顆逆寅與母加偽徽號手卷一軸偽勅書一張交通各苗府書啓四封偽曆日一本又據遵義道僉事趙邦清報本月十六日奢寅偽總兵高象乾隨帶家眷五百餘家來降又據仁合路監軍叅政王世仁副使徐如珂報據加銜副將羅乾象薛來衍報稱本月十九等日攻克白崖楠木等圍賊目舒廷彩羅書成挈家來降偽總兵酉兒及苗民萬餘亦來投降二十九日又據總兵李維新報稱探得奢

崇明父子計窮力竭寫具投狀一紙降了水西助兵四十營將欲過河老酋在獅子山將家口已送水西去訖奢寅在滑右點羿子兵欲來接陣各等因塘報到臣該臣看得紅崖天臺白崖楠木等圍爲酋三窟一朝平定酋之僞相僞將多被生俘印信一時俱獲永寧土地人民已強半還朝廷矣獨二酋奔入古蘭復有投入水西結連再出之說我官兵雖漸逼進而糧不接濟爲可慮耳除申飭文武將吏多方隄備五路漸入相機進剿掃穴擒酋一切功次行令道將查審紀驗安插候解外理

合具題伏乞勅下兵部一體案候紀叙施行爲此具本
謹題請旨天啓三年五月初二日上奉聖旨兵部知道

催餉辭銜免扇疏

題爲蜀局未能遽結置餉萬分難緩仰祈聖明削去兼
轄虛銜亟求接濟實惠事蜀用兵兩年窘困萬狀蒙皇
上慨發內帑續准戶部九卿會議扣留楚蜀南京料銀
接濟前後二起共一百六十六萬八千一百八十五兩
聖恩固已浩蕩卽諸臣心力已竭臣豈有曾無心敢爾
瑣聒但探囊必求應手畫餅難以充饑自解圍之後臣
一面設處行糧發各兵東赴重慶一面親督大將與逆
賊父子接戰於叙南等處迄今一年有餘五路堵截每

月數戰此十六萬人誰可一日不食乎總計臣所收過
評事曾守身解帑五萬主事王儀解帑六萬楚解三萬
共計一十四萬此外則催逼藩司不拘何項俱以應急
總計可三十萬而藩庫已蕭蕭若掃各邊軍糧且欠至
一百一十餘萬矣查據督臣張我續離蜀之日貽揭到
臣已用過帑銀四十五萬而蜀中徑用過錢糧大約四
十萬不在數內又鄖陽撫臣楊述中於兌發楚帑內支
去五萬一千七百二十七兩有零又如督臣張我續所
取楚中兌帑解夔三萬內支一萬八百兩與泰明屏兵

士援黔用餘一萬九千二百兩同後取五萬俱已起解
至湖廣常德府收貯援黔支用與蜀何與亦筭解蜀之
數此臣不任受也舍此而外尚有九十二萬六千四百
五十八兩內如四川加派遼餉油漆茶蠟生絹藥材銅
錫協濟等項共銀三十二萬零皆前歲調兵預那資賊
或逆賊殘破奉旨蠲免或以援兵經過所司徑那作供
應卽前督臣并各處用過蜀中四十萬以此相抵尚不
足數此一項又屬虛數惟是楚中前兌帑內尚該二十
六萬八千二百七十三兩後發帑該二十三萬五千二

百四十一兩合之五十萬三千五百一十四兩又南京料銀十萬此皆皇上所明與以救蜀者張口待哺日急一日而無奈其不能得也况當追賊入巢之時尤非安坐待餉之日臣如灼如焚無可爲計竊照皇上特授總督之銜兼轄楚之荆岳鄖襄陝之漢中者不過謂總攝列郡便於催督耳但鞭之長不及馬腹遣人往返動輒半載祇博一紙空文何濟於事除另造收支冊備具數目聽部科酌議外伏乞皇上將臣帶轄之銜速行削去責成彼中撫按依數催發接濟庶幾政不多門事無推

諉俾臣得少辭於庚癸之口而各將士亦獲藉以建尺寸之效則地方之萬幸也至於議留四川銅錫生絹藥材油蠟遼餉協濟湖貴陝等銀三十二萬兩零除天啓元年二年分者前款已支乞准免造起解事平委官查盤造冊開銷其天啓三年分者卽作蜀中扣留三十二萬二千九百四十四兩容臣徵收以充軍餉又南京料銀十萬兩併賜嚴催俾帑不虛發餉得實用又臣因兵餉急缺檄行布政司多方摻括接濟隨據左布政使林宰回稱司帑如洗僅存低假銅錫之類各邊嗷嗷言之

痛心而天啓四年分貢扇價銀數該一萬一千八十七兩尤難措處當此兵燹告乏公私罄懸民苦匠逃造辦甚難若業具題照天啓二年分蠲免一年省此萬金設法催那充餉接濟亦救急良策等情臣思任土作貢臣子大義非敢屢徼恩澤而該司痛心之言實非得已併乞勅下該部一體酌議覆請行臣遵照施行爲此具本謹題請旨天啓三年五月初二日上奉聖旨該省兵餉匱乏其發過銀兩著戶部設法上緊催解蠟茶已有旨了四年分扇柄准免以後照例解進朱爕元奉命總督

該管地方有不遵行的當嚴行叅處豈得推解該部知道

議處險躁監司疏

題爲議處險躁監司以肅軍政事臣惟軍旅大事疆土之安危三軍之生命係焉旣當其任卽此身不得復顧而况借賊邀名藐令違期有如僉事越其杰者乎臣知昏識短不識其杰底裏祇因其在荊州能收拾援遼放散之兵又隨各道共殲周鼎應援之寇意必有一段異材可任緩急適去年五月內該督臣張我續檄令提遵義之兵前往瀘合臣因而用之及見其識論浮夸全無實際心竊駭異訪之各監司俱曰馬有蹄嘴士有跡弛

本官之意實因虛僉憲熱衷意在加一道銜當此危急
之秋何惜虛名不鼓實用若異日不效操縱因在也臣
此時念切地方卽移會按臣張論備言其意竝爲疏聞
及蒙皇上俯允授以僉事職銜正其努力自建之日矣
豈意其別有肺腸不差巾幗祇工攫名之計漫無共濟
之思合江一路聚兵四萬有餘較長寧獨多原謂長寧
告急則此一路徑襲其後且爲遵義聲援非欲其高坐
也乃賊犯長寧入九遍危於纍卵任人叫呼曾不一應
又將一路之兵無故而分開三股自揀精銳爲一股迨

遙河上領糧則獨先報警則不顧致各將忿恨皆求別用臣屢檄激之祇爲虛詞以相報則意其嫌此路險峻調之至納谿而不應又意各將不用命囑令明言而又不應今三月二十二日總兵李維新密告師期定於本日誓師二十四日出兵獨此一路杳然無耗臣行文切責始報於四月初六日發哨及差守備朱可榮視之尚晏處先市與各將角口也訪之衆口則云本官部將唐天貴實與酋深交常有往來故此一路執定不進賊亦不來又據遵義道僉事趙邦清揭帖稱其攫利賣賊頗

有條款臣總疑風聞未便遽發至四月初八日據上東道副使徐如珂抄送到下南道叅政王世仁告示一道皆切責監紀不肯進兵之詞至末段有云如復病狂衷心秦越相視而以土地僥倖也是彼且不顧公事而我豈顧私情便將從前擁兵冒餉受賄行私及殺降賈賊等事一盤托出以聽上人處分等語方知本官上下厭薄遠近怨咨從前粉飾牢籠之局敗壞決裂不復能施其面目矣該臣會同巡按四川監察御史張論叅照得僉事越其杰意念不端機鋒橫出朝三暮四時興平地

之波口是心非專載白日之鬼兒戲不殊於壩上戈矛
橫起於師中卽其期會故抗已干後至之章况其乖謬
多端大負前茅之任叅之情法三褫非過惟是以前効
有微績一線可原應重加降調以示懲創伏乞勅下吏
部如果臣言不謬將僉事越其杰重加降調覆議上請
行臣遵照施行爲此具本謹題請旨天啓三年五月初
二日上奉聖旨吏部知道該本部覆議降二級奉聖旨
是

監儒助餉援例疏

題爲監儒仗義助餉援例乞授職銜以張勸典事據四川布政司呈奉臣批據原任兵部侍郎高文薦家孫高之釜呈稱藺賊圍城百有餘日軍需浩繁公帑告匱天啓二年正月內蒙委官親到釜家面諭借銀給散援兵釜卽撥括銀二千四百一十一兩金器皿五百五十六兩二錢玉帶六條大玉一塊大小玉石一十八塊大玉石鍾四箇小楚石鍾二箇古鏡五面古銅盆一面盡交司庫給有印信批照事寧補還釜思效忠一念何敢決

意望償願將前銀內除一千兩玉帶二條充餉更將銀一千四百一十一兩金器皿三百兩折銀一千五百兩照戶部頒發援遼新例俊秀子弟上納文華殿中書二千九百兩之例賜題授職其餘見存司庫金器玉物念係朝廷恩賚所賜祖宗辛苦懇乞給還等情奉批仰布政司查報奉此行據華陽縣回稱該知縣王琪查看得高之釜乃鄉紳高文薦家孫也奉文借餉仗義可嘉今據願將銀一千兩玉帶二束充作兵餉又將金銀折筭共二千九百兩照依援遼事例納入中書委與例合其

餘金器玉物亦應給還俯將高之釜照例准納中書等
因申司據此案照先承准戶部照會頒刻援遼東征事
例內一款文華殿中書徑題試職准差例今准俊秀子
弟納銀二千九百兩等因遵照在卷又據華陽縣聽選
監生李整呈稱蜀自奢甚但順院司彈心竭力保衛元
黎靡不周備惟是米珠薪桂人情洶洶整於天啓元年
十一月內卽捐銀五十兩米豆十石麵餅三百斤徑赴
軍門進助二年正月內又蒙委龍安府楊同知成都府
梁通判親到整家面諭借餉整卽盡將家貲首飾器物

共四千兩赴司交納印信批照內帑到日補還今軍需告急卽慨賜給下亦非急公全義本心願將前銀內除一千兩充餉查得援逾頒有開納事例歷滿聽選監生加銀二千五百兩徑題文華殿試中書鑿於萬曆二十七年八月內南監歷滿聽選給有應天府文引可據與例符合尚有餘銀五百兩容將鑿子李嘉胤援例入監准行取結起文赴部共足前銀四千兩之數誠兩便之策也懇乞轉請具題俾鑿得叨一命之榮子霑成均之化等情據此卷查先奉兩院案驗承准工部照會俱爲

欽奉聖諭事刊發事例書冊內開一監生加文華殿中書二千兩一童生入監納銀三百九十兩又援遼新頒事例願加文華殿試中書二千五百兩各等因通行遵照外今據前情該本司左布政使林宰看得奢酋圍省集兵乏餉不得已勸借民間高之釜捐祖宦之遺貲佐軍興之急用年甫幼冲志切於公以貨銀一千金玉帶二束以濟軍需其餘折筭二千九百兩援例納入中書試職餘物給還又監生李鏊捐借餉銀四千兩本生願將內除一千兩助餉餘銀二千五百兩加授試中書又

三百九十兩與子李嘉胤援例入監各與例合俱應俯從請乞本部院類題仍批行取結咨部等因又據兵巡上川東道副使徐如珂呈奉本部院批據本道呈據督餉重慶府同知劉國藩申蒙本道批據本廳申領兵加銜都司僉書王胤昌呈報自願遵例納銀八百兩穀五百石助餉查得戶部刊發書冊內開一通行省直義助東征銀兩生監儒吏軍民人等助銀五百兩以上粟一千石以上者許領勅書一道撫按衙門轉行有司備羊酒導送旌表其門仍許建坊入誌以傳永久懇乞備達

具題等因今查王胤昌捐銀八百兩穀五百石與例正合申詳到道該本道看得加銜都司僉書王胤昌所輸銀穀數與例合此其志誠足嘉而其誼亦足以風矣合候詳允行令合州動支銀二十兩給付本官照例建坊示異仍候具題各等因又據該道呈稱王胤昌攻復重慶親斬苗功應照例另敘由詳到臣該臣看得監生李鏊童生高之釜李嘉胤初乃倒囊濟公次則捐金充餉此外剩存自應照數措還乃自願援例授中書監生見有部發欽依新例似當准從加銜僉書王胤昌身旣效

力及行復捐銀穀共足千兩俱見急公之誼大於士馬
有裨既經司道查議前來理合一併具題伏乞勅下該
部查明事例將李鏊高之筮授以文華殿試中書職銜
聽差李嘉胤准授監生照例行取王胤昌查例授以遙
授職銜聽臣轉行有司備羊酒建坊入誌以禮獎勸親
斬功次仍候覈敘具題照例陞授酌議覆請行臣遵照
施行爲此具本謹題請旨天啓三年五月初二日上奉
聖旨該部知道該戶部覆奉聖旨是

保留給由府佐疏

題爲保留給由府佐官員事據四川布政使司呈奉臣批據敘州府申准本府推官宋萬畧牒稱見年四十四歲福建興化府莆田縣人由舉人萬曆二十六年五月內以副榜除授本省邵武府光澤縣儒學教諭丁父憂服闋補河南開封府洧川縣教諭陞湖廣漢陽府推官三十八年二月內陞浙江湖州府同知四十一年考察以推官調補廣東肇慶府推官四十三年四月初二日到任任內委署本府并德慶州印務督徵錢糧積貯稻

穀俱已完及分數扣該四十六年三月初一日考滿已
經預牒本府呈詳批允查結間隨於本年二月二十一
日丁母憂服闋赴部天啓元年六月內復除今職天啓
二年四月十一日到任隨署府事未徵錢糧無積貯稻
穀扣該本月二十一日連前任實歷俸三十六箇月三
年任滿例應給由等因照詳奉批仰布政司查報奉此
行准按察司并守巡等道各咨牒查得本官委於前項
年月日期到任前後二任歷俸考滿今方甫任署府數
日並未追徵積穀查無違礙應准給由第今奢賊造逆

地方多事需人甚殷本官職司理刑委查糧餉監紀功
次難以離任查與有事地方聽其保留事例相符呈乞
照例會題并開具稱職考語呈詳到臣卷查先准吏部
咨爲酌議考課之法以肅吏治事內開在外官員除方
面官在照舊赴京有事地方保留聽撫按官從公考覈
賢否具奏先令就彼復職管事牌冊差人齎繳其稱職
經薦應得誥勅命者照例請給其平常不稱職者部院
會同酌處又准吏部咨開凡遇邊方管糧府佐并地方
有緊急事情官員考滿俱照舊奏留又准都察院咨爲

治平要務急在保民等事內開省直撫按遇郡縣各官
考滿總將三六九年修舉過五事覈實造冊定稱職平
常不稱職之差等另報部院又准吏部咨內開以後考
滿官員不論前後歷俸年月多寡俱得通理本部仍兼
查兩處賢否以行考覈各等因俱題奉欽依移咨通行
在卷今據前因該臣會同巡按四川監察御史張論考
覈得敘州府推官宋萬畧厚同嶽峙潔比冰懸折獄寬
誣洞照題材涇渭無淆稱職及照府佐給由例應赴部
但今蘭苜猖獗地方需人料理一應軍餉錢糧當及時

清查難便離任該司乞要保留相應照例題請除批行
本官照舊帶俸管事外伏乞勅下吏部查果與例相合
准令本官免其赴部止將前後任內造冊齎繳本部再
加考覈題請施行爲此具本謹題請旨天啓三年五月
初二日上奉聖旨吏部知道

州縣正官給由疏畧

題爲遵例考覈州縣給由官員事據四川布政使司呈
奉臣批據巴州申准本州知州賀納賢關稱見年三十
九歲直隸鎮江府丹陽縣人由舉人云云廣元縣申准
本縣知縣陳鴻恩關稱見年三十五歲湖廣黃州府黃
岡縣人由舉人云云呈乞照例會題并開具各經薦稱
職詞語起送到臣該臣會同巡按四川監察御史張論
考覈得巴州知州賀納賢實心任事善政宜民光明徧
照逃亡慈愛力甦凋瘵廣元縣知縣陳鴻恩文江璀璨

琴案淒清經綸萬斛明珠撫字三春好雨二官職業俱
修考居稱職除批行帶俸管事任內行過事蹟徑自造
冊差人齎繳五事冊揭行令咨送部院外理合具題伏
乞勅下吏部將知州賀納賢知縣陳鴻恩再加考覈酌
議題覆施行爲此具本謹題請旨天啓三年五月初二
日上奉聖旨吏部知道

報克古蘭擒斬西目疏

題爲再報攻克古蘭擒斬水蘭頭目事先是官兵取永克圖招撫苗巢已經二次奏聞於時臣與按臣慮師老糧乏兵心不一臣假便宜封刀五口與按臣各差專官及督責將領五面齊入馬上移會貴州督撫雲南撫臣四下發兵牽制務獲元兇廓清巢穴間續據監軍紀功道府閔夢得李仙品王世仁等并總兵官李維新塘報稱逆酋備送美女金銀結購水西借兵復出水西頭目魯仲賢等領兵自白沙所一帶入獅子山行一晝一夜

來援蘭苗隨分布編裨將領分道進取叅將秦翼明楊應岳於天啓三年五月初九日午時攻取余家山與酋對敵追至箭竹坪將酋公館管房盡燒生擒逆賊阿稱二名口加銜副將張令同殺入余家山賊營屯劄保寧府知府張翼軫十四十五兩日攻打耿家洞一帶斬獲坐鎮永赤偽叅將者惡首級一顆招降頭目王貴等十八名併招撫安插赤水後山白龍仙人等處二十三洞一帶地方苗民加銜叅將舒遐領兵至落北溝與賊衝敵斬獲偽遊擊陳自榮首級一顆苗級一顆永安驛印

信一顆千總楊俸信父子得獲永寧百戶印二顆叅將
范繼道於落洞斬苗級八顆羅尚文於山羊洞斬苗級
一顆生擒偽都司樂世榮苗兵尹成俘獲一口刀槍三
件叅將林兆鼎於落海溝斬苗級二顆十二日秦翼明
秦拱明等復領兵攻打木頭寨老箐等處我兵分爲三
股殺入逆賊一見卽奔入深箐追斬五十顆生擒五名
牛馬三十匹楊應岳步斬苗級一顆刀弩三件秦拱明
於竹子溪斬功一顆又於落郎口與賊對敵西賊劊五
十營奢賊劊三十營被我兵殺敗十餘營追殺十餘里

斬功一顆加銜都司周朝佐追至斂箕壩搶獲馬二匹
又獲筠連縣被擄生員舒應先自古藺走出供稱賊父
子糾西賊六十營去落紅與羅乾象接陣勝則復出永
寧等情又據鎮道塘報羅乾象進兵於十三日大獲全
勝斬獲多功生擒無筭本職先於十六日發兵十八日
親督進剿等因二十日據鎮道塘報據監紀知府鄭朝
棟報稱十五日曾目白卜統一千餘賊欲出劫營王懋
官等伏兵斬賊級一十八顆俘獲婦女二口槍弩五十
餘件加銜守備任道重於李家崖追斬苗級一顆生擒

安賊二名阿九小五又據推官胡平表報稱十八日午時中軍潘映奎等徑進獅子山新寨將曾衙舍放火燒盡降苗旱二等三百名家口千餘情願協擒二賊等情五月十三日據鎮道塘報納路守備劉養鯤將官鄧懋官奉令分布由手爬崖一路徑攻古藺招降逆曾腰王偽總兵鄧國湖偽叅將袁應璧等男婦七十六名口復選勇將鄒世賢等領健卒暗入古藺州將古藺圍城公館衙舍街房盡行燒燬惟九鳳樓木大不燃是夜又轉燒石頭者斯螺螄等五寨苗營賊兵見火焰盛大俱逃

入深菁鄧懋官統兵追賊至滴水崖生擒酋賊楊二姜才七名又差守備劉誥等招降上里海底圍箐一帶宣布朝廷恩威招撫茨竹花秋廣木等處僞叅將羅高王心一等男婦五萬二千餘名口又據道鎮塘報瀘州知州王新民報稱督率所部官兵多方誘諭魯之羽翼心腹日漸剪離於是沈戴馬口等處苗民共計七千餘名投降願爲前鋒等情五月十九日據仁合路監紀叅政王世仁副使徐如珂塘報據監紀同知劉鼎新報稱四月二十八日僉書薛來衍守備張明遠報羅書成舒廷

彩等統兵至麻窩招降彼中逆民對敵當陣斬獲一十六顆又殺賊目丘明忠復招降民計五千六十二名口督陣指揮楊元譚正宸等同副將羅乾象統兵戰於銅鼓坪圍樂用等寨與賊首羅向宸偽相張向極等分三路大戰賊不能支緣崖而走衆兵追殺張向極張聯極投崖跌死我兵一擁上圍入寨斬功百有餘顆生擒賊黨二百名口牛馬器械無筭各寨房屋盡行燒燬俘獲婦女即日解驗招降大寨寶瓦柿子等處山溝降人羅宗啓等二千餘名二酋借水西之兵十三營來敵我師

文武大小將吏羅乾象等分布譚正修羅萬象譚大孝
譚正常等由官庄分爲先鋒左右翼於本月十三日直
取古藺迎敵自辰戰至午後斬獲苗功五百餘顆內一
顆係水西僞大都督元帥魯仲賢更名魯廉頭重二十
斤又一顆係水西僞總兵羅奇又二顆係蘭州僞總兵
陳二僞叅將李先芳生擒解驗水西苗賊阿呼把等七
名及仲賢等首級戰馬器械不計其數乘勝殺入攻克
古藺州又燒牌坊一座賊四散逃入深箐審據生擒酋
黨供稱奢寅因永寧大敗酋父子將桌一張去其一腳

擢往水西借兵魯仲賢等先統十三營於五月初一日
起身十二日到此大戰又供尚有三十營未到此去必
來報警等情五月十七日據真綏遵義二路監紀叅政
吳國仕叅議趙邦清塘報據加銜副將陳一龍探得奢
寅父子果於四月二十七日發人挑線細數十擔羸馬
二百隻銀子十二包男女二百名口送水西九股借兵
又據加銜遊擊楊通需移報西賊游朝柄等將金雞坪
等處復業降民擄去數十本官統兵追至李稍塘斬級
三顆生擒一名目下見分大兵各殺入古蘭等情各塘

報到臣該臣看得入永破圍之後復取古蘭賊巢兼敗
水西助惡之兵斬其二頭目從此一面招撫一面廓清
蘭事已有次第惟是霪雨一月穴險箐深二酋之蹤跡
難覓糧米之轉運甚艱况蘭未告終安復狂逞兵屢戰
而疲路轉入而險如臣碌碌抱病從事尚未知機會若
何除犒賞各將吏與一切機宜臣同按臣料理務獲兩
逆獻之當宁魯仲賢等首級與獲水西賊兵已經解到
臣衙門查仲賢係攻圍貴州首惡見委多官辨驗真確
及移貴州督撫火速進兵彼此牽制外伏乞勅下兵部

查明紀叙以慰効力諸臣軍士施行爲此具本謹題請
旨天啓三年五月二十七日上奉聖旨賊巢盡破蕩平
有期員役總候查明議叙該部知道

續揭報獲賊衣飾等物

爲續報得獲賊仗事職繕再報攻克古蘭擒斬水蘭頭
目疏完發行間又據監軍三道叅政等官閔夢得李仙
品劉可訓報據監紀知府鄭朝棟報稱奉院道傳檄責
成招撫天臺等大囤賊目羅輔周貴羅於朝等率散目
二百五十人來歸得獲逆苗父子收藏囤內偽器金冠
金銀鞍鐙違制苗服等項共二百三十五件前來理合
轉解以俟獻俘等情到職卽於公堂同文武等官逐廂
點驗封發按察司收貯候拏獲逆賊奢崇明父子之日

一併解進外合行揭報以備查考施行

計開

金女冠一頂同寶石連段裏秤重十七兩

八錢

大紅段織金袞龍綠裏邊單袍一件

綠花段袞龍績繡補紅裏邊單袍一件

織金袞龍段面藍裏背心一件

紅段織金袞龍面藍裏背心一件

青花織金單袍一件

紅雲段織金單袍一件

天青段面火裏紅裝花裏邊袍二件

青段面火裏紅裝花裏邊袍一件

蘇官綠段面裝花裏邊單袍一件

紗綠面裝花裏邊單袍一件

紫段面繡花裝邊單袍一件

紫段面絳閃段裏邊單袍一件

大紅雲段面綠裏邊繡錦單袍一件

火裏焰花紬面補錦紅裏邊單袍一件

綠閃段黃花面織金補紅裏邊單袍一件

綠閃紅拱線績繡補面紅裏邊單袍一件

油綠紡紬織金補紅邊單袍一件

裝花五色段績繡補單袍一件

青綠雲段織金補單袍一件

綠花絹面裝花邊單袍一件

藍閃段面績繡補單袍一件

天青段看花補面紅紫裏紅裏邊袍一件

綠閃段績繡補單袍一件

紫地銀花段紅裏邊單袍一件

藍段績繡補單袍一件

紅花段五色裏邊單袍一件

綠素段裝花天青補單袍一件

梅紅細花彭段插錦藍邊袍一件

白綿細細褶男道袍六件

綠花段績繡補紅邊單袍一件

藍雲段績繡補單袍一件

藍錦刻絲紬刻絲補單袍一件

天青刻絲補單袍一件

織金素段填金補紅邊單袍一件

藍段績繡補單袍一件

織金綠袍績繡面藍紗裏袍一件

藍花紡紬織金補單袍一件

紅素段刻絲補單袍一件

青素段織金補單袍一件

綠花紡紬績繡八寶補單袍一件

綠雲段紅雲段裏補單袍一件

青素段刻絲補單袍一件

綠花段績繡補單袍一件

藍八角絹面插錦紅襄邊單袍一件

橫織金面綠絹裏女圓領一件

紅段績繡袖女衫一件

紫倭段面小袖銀花裏男衣一件

紅紵絲織金面藍裏小袖女衣一件

織金紅面大袖女衣一件

藍花紬績繡女衣一件

綠段面裝花藍絲裏背心一件

水紅拱線段面藍裏背心一件

五色裝花面藍裏背心一件

桃紅花段面藍裏背心一件

葡萄色段面綠閃段裏裏邊背心一件

內裏珠金牌卸一副金梅花十四箇

銀花紡絲紬面紅段裏背心一件

紅素紵絲福絹面藍福絹裏背心一件

繩五色裝花面紅紗裏背心一件

大紅段面綠裏裝花梅條背心一件

銀花線紬藍裏背心一件

苗女霞帔一件紅面繡錦裏邊銀飾件七

十塊墜鈴五十二箇珍珠古老錢一面

填金紅絹一疋

裝花閃絹一疋

綠素紵絲一疋

紅填金絹一疋

綠閃紅段一疋

桃紅填金段一疋

裝花紅段一疋

填金紅段一疋

裝金綠蜀錦段一疋

織金坐褥面二幅

刻絲單絨裝閃面一件

苗細褶女裙一條

紅段舊女裙一條

白綿紬二長疋二小段

藍絹女裙一條

銀紅段女裙一條

紅閃色女裙一條

紅段毳邊女裙一條

珍珠攢盒二架

毳裙邊一細

皂靴一雙

女鞋底一把

銀包金裏馬鞍一座內銀鞦珠五十六箇

銀包鞦韆一件銀裹鏡一副馬纓槍纓
其一袋

又據道鎮解僞大都督樊虎大元帥錫印
一顆

又據監軍同知劉鼎新解扶國頑僞大元
帥錫印一顆

天啓三年五月二十七日揭報關部科

殘邊加陞道臣彈壓疏

題爲殘邊重地彈壓需人亟議陞用勞臣以便責成事
臣惟遵義新疆路逼水蘭內則舊民助逆外則安酋屢
犯郡城蕭蕭鞠爲茂草臣自昨歲倖解錦官之圍卽有
戎州之役經年臨敵應接不暇及今解嚴始得放舟東
下永寧古蘭旣已蕩掃則惟遵義一路最爲喫緊矣近
准督臣楊述中會藁欲移總兵魯欽駐鎮遵義則不必
再設大將而扼要居衝儼然有虎豹之勢地利人事委
爲兩便及查道臣僉事趙邦清已陞川北叅議又經議

委督冊事務新任道臣侯國尚未到任該臣會同巡按四川監察御史張論查得叙馬瀘道副使李仙品見在軍前堪以委任除移檄外本官自辛酉年六月甫任卽督兵東援及撤兵回叙適值二賊入犯百方拮据收旣散之人心培方張之虐焰來佛之戰追奔數百里恢復建武併南六縣嗣後或泊江澣或入箐崖身先士卒艱苦備嘗乃其嚴毅而不殘苛明察而更縝密經權互用操縱咸宜真得師貞之窾繫者也目下取永搗蘭已建奇功叅以常格自應卽寄節鉞但二賊尚逋震鄰未戢

賢者多勞勢非得已合無加陞四川布政司右布政使
責成管理該道事務馳入新疆與總兵魯欽共相籌畫
且得與臣朝夕從事在本官爲舊游易於整頓而將士
憚其威嚴更加鼓舞人地委爲相得危苦諒所難辭理
合具題伏乞勅下吏部再加酌議將_三仙品加陞右布
政使管理遵義道事頒給應得勅書覆請行臣轉行本
官遵照任事施行遺下叙瀘道員缺卽以近補遵義副
使侯國政補移駐建武宣威撫輯烏蒙鎮雄問罪東川
烏撒完此一面事局庶於安攘兩有裨益爲此具本謹

卷之二

六

六

題請旨

就近改補改陞府佐疏

題爲邊境佐理乏人謹遵明旨就近陞補以奠遐方事
臣謂遵義自破殘之後歸鴻無恃保釐料理不可乏人
該臣會同按臣將彭縣知縣今陞雲南臨安府同知冉
峯具題就近改遵義府補同知張起鶚員缺今接邸報
見前督臣張我續復命疏中冉峯掛名彈章矣隨卽牌
行四川布政司查合屬資俸及期相應官員作速議補
又查龍安府同知嚴實屢次告病出境地處邊徼員缺
難以久懸亦應併議以憑具題去後隨據該司左布政

使林宰回稱查看得潼川州知州陳時宜當戎馬生郊
征繕旁午固西北一咽喉也本官鎮靜不擾集兵餉以
捍收圍至援兵絡繹於途魚休鴛鷺民至苦兵重於苦
賊士民安堵則該州之潔守茶葉堪茹長才艱宏能任
可知已茲已久陞平涼府同知應加成都府同知仍管
州事今冉峯旣掛彈章卽以本官改補遵義人地果得
其宜平武縣知縣李克讓見兵食之告匱義形於色履
任數日盡捐橐中資斧三百餘兩仍傾家鬻產再捐千
金以佐急需此其公爾忘私卽賢者猶以爲難况白蒞

邑以來府與廳虛無人焉該縣獨力支持署府籌邊苗裔帖然政事與行誼俱優吏材與忠膽並著者今本府同知嚴實告病決意回籍應否准其陞補員缺伏乞具題以茲激勸其於吏治軍務不無裨益矣等因通詳到臣該臣會同巡按四川監察御史張論查看得夜郎天末居水藺接壤散而復合之民正當撫摩整頓漸復元氣阻遏兩逆自非賦才超邁秉節孤高者不能任之潼川州知州今陞平涼府同知陳時宜丰標昂秀才穎華清心室有懸魚斂手案無留牘聞報陞轉士民赴臣

苦憇借寇甚切先議加銜成都府同知仍管州事今新任知州姚繼崇業將履任應以本官改補遵義同知以備嘗艱苦之官當支衝起瘠之任甚屬妥便平武縣知縣李克讓才識周詳趣操謹凜甫任數日倒囊助餉三百復見賊勢披猖鬻產再勁千金俱自原籍解四川藩司以濟急公查龍安府未任同知嚴實因病乞休未經履任行據該司回稱久於荊州養病未痊回籍訖合無將本官陞補前缺以爲仗義爲國者勸其於遐荒僻壤未必無小補矣理合具題伏乞勅下吏部覆議上請將

陳時宜改授遵義同知員缺如銓補有人或於川中各
府就近改補一缺以竟其才遺下平涼府員缺另行銓
補知縣李克讓陞補龍安府同知以安邊域嚴實准令
致仕行臣衙門轉行二官遵照施行爲此具本謹題請
旨天啓三年五月二十七日上奉聖旨吏部知道

請勅專官督理黃冊疏

題爲請給督冊專官勅書董理黃冊事據四川布政使司呈奉臣紙牌照得天啓二年又該天下大造黃冊之期應於布政司左右叅政叅議內資俸尚淺者一員議詳今該司各道俱案奉深見在軍前料理况黃冊重務勢難再緩牌仰該司官吏上緊定議一員以憑坐名具題請勅專理督冊等因奉此該本司左布政使林宰查得本司分守五道上下川南見在軍前料理守東業已報陞守西又以齋捧登途今冊務已興稽覈不可無人

及查遵義道僉事趙邦清已陞守北右叅議卽以本官
管理督冊事甚妥便伏乞具疏請給勅命庶得責成等
因呈詳到臣卷查先准戶部咨爲申嚴黃冊事例特懲
因仍敝習以重版圖以甦民困事該本部議覆該南京
戶科等衙門署管後湖事給事中等官歐陽調律等題
稱天啓二年又當大造之期覆請命下本部移咨吏部
查將浙江等布政司右布政左右叅政叅議內擇其年
資尚淺才力素著者每省一員并南北直隸巡撫都御
史疏名上請咨部移文內府翰林院撰給勅命督理冊

務通候事完方准遷轉等因覆奉聖旨是欽此欽遵移咨前來隨經通行去後今據前因該臣會同巡按四川監察御史張論查得十年大造國家重務委官專管原有成例及照分守川北道右叅議趙邦清才名素著陞補方新正與例合雖資深功懋當有不次之擢而見今乏材不得不資料理既經該司議詳前來理合具題伏乞勅下該部查照往例撰給勅書與應得事宜頒發前來責成本官通行取冊覈查完日造冊奏繳施行爲此具本謹題請旨天啓二年五月二十七日奉聖旨該

部知道